

Date – 27/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram State Project Monitoring Committee chuan Kolasib District-a Sawrkar hmalakna hrang hrang leh hmasawna ruhrel thawh mekte an enfiah.
2. Siaha Dist-a Naoatla - I leh Naoatla- II, khua chawmtu tur ni zung chakna hmanga tui lakna chu PHE Minister Prof. Lalnilawman a hawng.
3. Union Cabinet chuan Scheme to Promote Manufacture of Sintered Rare Earth Permanent Magnet atan cheng vaibelchhe sang 7 leh 290 a pawm.
4. Hong Kong-a mihring chenna in sang kangah mi 13 an thi a, mi 15 in hliam an tuar.

<><><>

MSPMC

Mizoram State Project Monitoring Committee (MSPMC) Vice Chairman Pu R. Lalrinawma hovin Kolasib District-a Sawrkar hmalakna hrang hrang leh hmasawna ruhrel thawh mekte a hmuna enfiah a ni.

Kolasib District an tlawhnaah hian Vice Chairman Pu R. Lalrinawma chuan, an kal chhan ber chu tihdiklohna lai zawng tur ngar ngara kal an nih loh thu a sawi a. Hna tha zawk leh chak zawka thawh a nih theih nana hmalakna te sawiho tura kal an nih thu a sawi. Department hotute, Engineer leh Contractor-te chu an hnathawh kawnga an harsatnate sawilang turin a chah a, sawrkar a thlen ngai a awm pawhin a tul anga an thlensak tur thu a sawi baw. Amaherawhchu, hna dik leh tlo, a sanction a nih ang taka thawh chu an tihmakmawh a ni, a ti.

SPMC team te hian Thingdawl Agriculture Farm tlawh hmasa berin, hetah hian thawktute nen an hmalaknate an sawiho a. Thingdawlah hian Alu chi dahthatna tur 'Solar Powered Cold Storage' leh Seed Processing Unit-te an tlawh nghal a ni.

Hemi hnu hian I&PR Conference Hall-ah inhmukhawmin, thutawi sawina leh inhmelhriattirna hun hman a ni a. Hetah hian team hnihah inthenin Kolasib chhunga sawrkar hmunhna Project hnathawh mekte tlawh turin an chhuak zui a ni.

Kolasib khaw chhungah hian MSPMC te hian khum 100 lenna District Hospital sak mek te, District Jail thawmthat mek te an tlawh a. Heng bakah hian Project Veng-a Fast Track Court sak mek te, Revenue Staff Quarters Complex sak mek te leh DIC Flatted Factory sak mek te an tlawh baw a ni. Heng hmunah te hian an hnathawh dante uluk taka enfiahin, Department aiawhte, Contractor leh Engineer-te nen an inkawm a ni..

He hunah hian Vice Chairman hi Er. Lalthanzuala Ralte, Secretary, MSPMC leh MSPMC member dangten an tawiawm a ni.



TRANSPORT MINISTER

Transport Minister Pu Vanlalhlalan Sawrkarin truck neitu leh khalhtute harsatna a hre reng a, Kawnpui leh Khamrang inkar kawngpui pawh NHIDCL kutah awm tawh mahse PWD-in a vilpui thin a ti.

Nimina Mizoram Truck Owners' Association Office thar Aizawl Bawngkawn ami a hawnnaah he thu hi sawiin Minister chuan Khawthlang lama an mu tan, NH44A hna hmabak pawh Ministry-in cheng Vaibelchhia 134 an rawn sanction tawh thu leh tunah hian tender chhuah mek a nih thu a sawi a. He kawng atana 'One Time Improvement' thawhna tur cheng vaibelchhe 48 pawh Regional Office ah a inchiah mek thu a sawi bawk.

Minister chuan ATL Road pawh hna thawh tan theih a nih phat atangin official-ten hma an la nghal a ti a, Lunglei khawpui chhung kawngpui chu Krismas hmaa blacktop tum a ni a, Aizawl khawchhung resurfacing pawh kalpui mek a nih thu tarlangin nakum March thla tawp lama zawh theih an in beisei thu a sawi a, Supreme Court atangin a khat tawkin thil tih tihhlawhtlin tur ruahmanna a rawn siam thin a, Tun dinhmunah Speed Limiting Device vuah vek turin a rawn ti a, Hei bakah hian Transport Department hmalaknain weighbridge hmangin bungraw phur truck-te buk thin a ni chu phurrita la mai lova, an him tlanna tur zawkte, kan kawngpui a tlo zawkna tur a ni tih hre thar turin a chah bawk.



NE ON WHEELS

Amazing Namaste Foundation buatsaih India hmarchhak state-te zirchianga hriat chian leh zual tuma lokal 'New Bike Expedition - Northeast on Wheels' member-te pualin nimin khan Larsap General (Retd) Vijay Kumar Singh-an Raj Bhavan Durbar Hall-ah cultural programme leh inkawmhona hun a buatsaih.

Larsap huan hmarchhak state hriat chian chaka lo zin 'New Bike Expedition - Northeast on Wheels' member-ten Champhai District hmun mawi tak an tlawh thei chu lawmawm a tih thu sawiin, district dang mawi leh nuam tak takte pawh tlawh chhunzawm zel turin a chah a. Mizo mipuite chu kawm nuam leh hawihhawm tak, tanpui ngaite pui tura inpeih reng an nih thu sawiin, Mizoram khualzin hip tura theihna nasa tak a neih thu leh Kût tlawh manhla tak tak a buatsaih thin thu a sawi bawk.

Larsap chuan Amazing Namaste Foundation thiltum chu ropui a tih thu sawiin, Mizoram rawn tlawhtute chu an chenna hmun theuha an kir hunah pawh midangte Mizoram leh hmarchhak state dangte chanchin mawi leh tha hrilh a, rawn kal ve ngei tura hmin turin a chah a. Amah ngei pawhin kum 1971 ah a tum khat nan hmarchhak state a tlawh thu leh state tinte'n danglam bikna mawi tak an neih theuh thu a sawi bawk.

Amazing Namaste Foundation Chairman Pu Atul Kulkarni-a chuan Mite'n hmarchhak state an hriat chian theih nan Amazing Namaste Foundation-in kawng hrang hranga hma a lak thu sawiin, New Bike Expedition chu heng zinga hmalakna pakhat a ni a ti a, Adventure Ride mai a nih loh thu leh hmarchhaka chengte, a ram pianhmang leh hmunhmate hriat chian nana buatsaih an nih thu a sawi a. An kalna hmun apiangah a remchan dan ang zela khawtual mite an kawm thin thu sawiin, state Sawrkarte tawiawm thinnaah lawmthu a sawi bawk.

He hunah hian Aizawl Thunders, Lushai HOG leh Triumph Mizoram member-te bakah hemi kaihnhawih tualchhung mi sawm bikte an tel a ni.

<><><>

MAHFED& BBSSL MOU

Mizorama loneituten thlai chi tha zawk an neih theihna atan nimin khan Mizoram State Agriculture, Horticulture, Forestry and Marketing Cooperative Federation (MAHFED) leh India rama thlai chi pechhuak thin, Bharatiya Beej Sahakari Samiti Ltd (BBSSL) te chuan thawh hona tur thuthlung an ziaik.

He hun hi Cooperation Minister Pu PC Vanlalruata Pisa-ah neih a ni a, thawh hona tur thuthlung ziah inkhawm hi Pu John LT Sanga, Cooperative Society Registrar chuan kaihruiin Pu H. Vanhlupuaia, Managing Director MAHFED Ltd. leh Pu DR. Omveer Singh, Adviser BBSSL ten thawh hona thuthlungah an hming an ziah hnan a ni.

BBSSL hi India ram pumpui a thlai chi buaipui a pechhuak thin National Cooperative Society an ni a, an ni hian MAHFED te chu cooperation society kaltlanga thlan chhuah an nih avangin thlai chi an pe dawn a ni.

<><><>

SIAHA SORLAR PUMP

Siaha Dist-a Naoatla - I leh Naoatla- II, khua chawmtu tur ni zung chakna hmanga tui lakna chu nimin khan Naoatlaa Tourist Lodge ah PHED Minister Prof. Lalnilawman a hawng a, Siaha bialtu MLA Dr. K. Beichhua chuan he hun hi a hmanpui a ni.

Prof. Lalnilawma chuan Naoatla - I leh II - ten tui thianghlim an neih nan a bik takin PHED - ten theihtawp an chhuah bakah khawtlang mipuite pawhin an tawiawm tha hle a ti a, tui pump khawl leh tui zem enkawl chu khawtlang kutah thui tak a inngat a, neitu thinlung pu turin a fuih a ni. Prof. Lalnilawma chuan WATSAN Committee - thutkhawm hunah pawh tui bill mumal tak siam a, a thlawn a tui sem mai lo tura chahin, hei hian a chhiat palha siam that kawngah nghawng tha tak a nei ang a ti. Minister chuan tui pump khawl tha tak awm mahse, tui hna a awm lo ang tih a hlauhawm hle tih tarlangin, tui hna humhalh kawngah theihtawp chhuah turin kalkhawmte a chah a ni.

Minister chuan tui in tur thianghlim pek kawngah PHED - ten theihtawp an chhuah zel dawn a, mipuite mamawhna chu tha taka hlen zel tum a ni, a ti. Tui pek chungchangah khawl chhiat vang te, pipe chhiat vang leh thil dang avangin tui pek theih loh chang a awm thin a, hemi kawngah hian mipuite nen inhriatthiam tlan a pawimawh hle a ni, a ti. Minister chuan Strawberry leh Naoatla- ten inzawmna tha tak an nei tih sawiin hei hi hmang tangkaia strawberry hmanga an khua vawrh lar tur pawhin a fuih nghal bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CM

Core Committee on Thenzawl Peace City te chu an Chairman Pu Lalduhoma, Chief Minister hovin nimin khan CM Conference Hall-ah an thukhawm a. Thenzawl Peace City huam chhunga Greenfield City proposal siam mek an thlirho.

UD & PA Secy Pu Lalmalsawma Pachuau chuan SASCI ah hian Urban Planning Reforms hnuaiah tinzawn bik neia Greenfield City kalpui theihna component cheng vbc 150 vel hmuh theihna a awm a, inelna atanga hmuh tur a ni. Thenzawl Peace City huam chhunga Tourism leh AH & Vety Department ramte behchhanin he fund hmuh theihna tur Greenfield City proposal hi duan a ni ta a ni, a ti.

Thenzawl Peace City Master Plan siamtu tura thlan IPE Global mithiamten Greenfield City proposal hi a lem nena entirin chipchiar takin an sawifiah a. An ruahmanna siam hi Core Committee hian a pawmsak a, Ministry of Housing & Urban Affairs ah thehluh a ni ang.

<><><>

NEWS

Akashvani Aizawl Regional News Unit in Aizawl, Hnahthial, Chawngte, Vairengte leh Champhai North atana Part Time Correspondent a lak tur te interview hun chu Dec ni 3 khian neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

CABINET

Union Cabinet chuan Scheme to Promote Manufacture of Sintered Rare Earth Permanent Magnet atan cheng vaibelchhe sang 7 leh 290 a pawm. Hetiang hmalakna hi sawrkarin a neih vawikhatna tur niin kum khatah metric tonne sang 6 chuang Rare Earth Permanent Magnet siamchhuah tum a ni. Union I&B Minister Ashwini Vaishnaw chuan Union Cabinet thutkhawm chungchangah hian New Delhi-ah chanchinbumite kawmin Rare Earth Permanent Magnet chu khawvela magnet chak ber pawl an nih thu sawiin electric lirthei te, energy thianghlim siamnaah te, electronic serospce leh ralthuam siamna lamahte an tangkai dawn hle a ni a ti.

Union Cabinet hian Pune Metro Rail Project Phase-2 siam nan cheng vaibelchhe sang 9 leh 857 a pawm bawk a. Union Railway Ministry hnuaia project pahnih atan cheng vaibelchhe sang 2 leh 781 a pawm bawk a ni.

<><><>

HONG KONG

Hong Kong-a mihring chenna in sang kangah mi 13 an thi a, mi 15 in hliam an tuar. Thudawn danin kangmei chhuahna hi Tai Po district ah niin in sang pathum a kang a. Kangthelhtu mi 700 chuanguin kangmei thelh hna an tawk a. Heng insang pathumah hian mi sang li leh 600 chuang an khawsa nia thudawn a ni.